

# Xanana Gusmão: “Ita Manan Ona Australia”

Reportajen: Thomas Sanches

DILI – Timor-Leste (TL) manan ona governu Australia iha tribunal arbitrazen internasional Holanda, relasiona ho kazu espionazen no prende dokumentus nebe mak governu Australia halo mai governu TL.

“Ita manan, manan iha desizaun tolu, ida mak tribunal inter-

nasional dehan ba Australia la-bele kontinua halo espionazen ba Timor-Leste. ida tan maka dokumentus Timor-Leste nebe mak governu Australia prende tenke fo fila hotu, la bele book no ida tan tribunal husu ba Australia la bele uza material ka informasaun nebe mak iha dokumentus neba lori ba tribunal internasional, tanba prosesu sei naruk nafatin, tanba

ho ida nee kria desvantazen ba Timor-Leste.” hatete Primeiru Ministru (PM). Kay Rala Xanana Gusmão ba jornalista sira iha salaun enkontru Ministeriu Negosiu Etranjeiru (MNE). Tersa (04/03/2014).


Xefe Governu nee mos hatutan, prosesu kontinua lao nafatin no ho desizaun sira nee halo Timor-Leste kontente no

kontinua prepara an nafatin hodi lao ba oin. Tanba dalaruma rai boot no riku sira nee buka impoin deit ba nasaun kiik sira.

“Ita haree dalaruma rai boot sira nee buka impoin husi nasaun kiik sira, maibe ita toman tiha ona sente ba buat todan ida iha ita nia ulun fatuk leten, tenke hasai tiha ida nee hanesan lisaun boot ida ba rai hotu-hotu iha mundu katak.

ohin loron nee relasaun internasional nee laos rai boot deit mak halao, iha desizaun ida nebe mak tribunal internasional hasai kona-ba Australia halo espionazen nee iha juis ida deit mak kontra mais restu husi nee apoiu hotu ita,” Xanana haktuir.

Tuir Xanana, esforsu nebe mak Timor-Leste halo hodi garante soberania estadu nee halo ho fuan. Tanba nee mak TL la permiti iha rai laran atu mosu tan forsa rua no bendeira rua maibe tenke kaer metin TL nia soberania iha rai liur nomos iha rai laran. “Prosesu sei naruk no kontinua lao, maibe atu dehan katak tuir prosesu nee ita manan tiha ona.” tenik Xanana.



PM Kay Rala Xanana Gusmão

**Suara Timor Lorosa'e, 5 Marsu 2013 Pajina 1**